



Senin, 24 Oktober 2022
Ogen: Efesus 4:22-24



"Tangtangi Manusia Si Male"



Male vs Mbaru. Adina lit bajunta si enggo male tentu lit ka ateta baju si mbaru, adina lit sepatuta si enggo male tentu lit ka ateta sepatu si mbaru, adina cat rumahta nggo male tentu ersura-sura ka kita nggantisa alu cat mbaru. Inti, makana barang-barang si nggo male/lanai terpake e lanai pantas guna ngiani rumahta dengen nggo kurang sikap akap lako makesa entahsa pe ngenehenca. Bage me pe kerna perbahanen,perukuren ras biak.

Efesus 4:22-24 si jadi bahan paksa tenengta wari enda pe ningetken man banta; "dage tangtangilah manusia si male, si erbahanca kam nggeluh bagi si nggo-nggona. Manusia si male si meneken bana alu sura-surana si nipu." Contoh-contoh perbahanen manusia si male e me erlua-lua, erlagu la mehuli, merangap, nembah man berhala, rubati, ngukurken kepentingenna saja, erbahan perpecahen, nakiti pusuh temanna ras sidebanna. Perbahanen-perbahanen si bage rupa mpeturah ate mesui man dirina bage pe man kalak sideban.

Tentuna perbahanen entah pe biak si encedai perlu i pedauh dengen itangtangi i bas dirinta nari. Pustaka si Badia nuratken maka kalak si nggeluh denga i bas perbahanen si male la banci lang ndatken ukumen i bas Dibata nari dengen la dat bagin i bas Kinirajan Kristus (Galatia 5:21b).Ibaratken bagi barang-barang si male i bas rumahta, adina lanai erguna bage pe lanai bo i pake madin iagui jenari itutung, erkiteken adina ipeturut i je banci jadi menci erasar, ingan rengit muniken dirina bage pe ingan ipes. Si e kerina mpeturah pinakit. Biak manusia si male pe banci mpeturah pinakit adina siasuhi, sebabna turah me ukur serbut dinge gulut, teman meriah pe banci nadingken kita e maka perlu kel si agui dengen i tangtangi arah kegeluhenta nari.